

मार्निंग डोगरी न्यूज़ बुलेटिन, समे. 09-20 Hrs

<><><><><><>

Headlines

1. प्रधानमंत्री नरेन्द्र मोदी होर तेज रफ्तार विकास लेई केन्द्र ते राज्ये बश्कार सांझ-भ्याली गी होर तगड़ा बनाने लेई अज्ज मुख सचिवें दे चौथे राश्ट्री सम्मेलन गी संबोधित करडन।
2. इक राश्ट्र इक चुनांऽ कन्नै सरबंघत द'ऊं विधेयकें गी कल संगारें लोकसभा च पेश कीते जाने दा कार्यक्रम ऐ।
3. जंदे जून महीने रियासी च श्रद्धालुएं दी बस पर होए दे आतंकवादी हमले दे मामले च एनआईए नै आरोप पत्तर दाखल करी दित्ता ऐ।
4. केन्द्री गृह मंत्रालय नै जम्मू ते मेंढर बश्कार रियायती दरें पर हैलीकाप्टर सेवा शुरू करने दी मंजूरी दित्ती ऐ।
5. हॉकी च महिलाएं दे जूनिया एशिया कप 2024 दे फाईनल च अज्ज भारत दा मुकाबला चीन कन्नै होग।

<><><><><><>

PM-Chief Secretary

प्रधानमंत्री नरेन्द्र मोदी होर अज्ज नमीं दिल्ली च मुख सचिवें दे चौथे राश्ट्रीय सम्मेलन गी संबोधित करगंन। श्री मोदी होरें कल सम्मेलन दी प्रधानता कीती ही। त्रै दिन तगर चलने आला एह सम्मेलन शुक्रवारें रंभ होआ हा। एहदा मकसद राज्ये दे सैहयोग कन्नै सांझे विकास एजेंडे दी समीक्षा ते अमलावरी जकीनी बनाना ऐ। सम्मेलन च केन्द्र ते राल्य सरकारें दी हिस्सेदारी गी निगगर करने ते सहकारी संघवाद, तेज आर्थिक वृद्धि ते विकास च बेहतर तालमेल जकीनी बनाना ऐ। एहदे च सब्बने राज्ये ते केन्द्र शासत प्रदेशें दे मुख सचिवें, आला अधिकारी ते माहिर हिस्सा लै करदे न।

<><><><><><>

PM-LS Debate

प्रधानमंत्री नरेन्द्र मोदी होरें इस गल्ला पर जोर दित्ता ऐ जे संविधान मुल्खे दी एकता दा मुख आधार ऐ। श्री मोदी होरें बन्नसबन्नता च एकता गी मुल्खे दी टकोह्दी खासियत दस्सदे होई आखेआ जे उंदी सरकारै मुल्ख दी एकता गी निगगर करने बक्खी नीतियां बनाइयां न ते फैसले लैते न। लोकसभा च भारत दे संविधान दे 75 ब'रे दी गौरवशाली यात्रापर खास चर्चा दा परता दिंदे होई प्रधानमंत्री होरें एह गल्ल आक्खी। प्रधानमंत्री होरें आखेआ जे उंदी सरकार सम्मान नागरिक संहिता लागू करने लेई वचनबद्धत ऐ। मोदी होरें आखेआ जे एनडीए सरकार धर्म निरपक्ख सम्मान नागरिक संहिता आन्नने आस्तै कम्म करा'रदी ऐ।

<><><><><><>

One Nation One Election

इक राष्ट्र इक चुनांस कन्नै सरबबंधत द'ऊं विधेयकें गी कल संगारें लोकसभा च पेश कीते जाने दा कार्यक्रम ऐ। केन्द्री विधि मंत्री अर्जुन राम मेघवाल होर 129मां संविधान संशोधन विधेयक ते केन्द्र शासित प्रदेश संशोधन विधेयक लोकसभा च पेश करडन। हाल च गै सरकारै मुल्ख भरै च कन्नो-कन्नी चुनांस करोआने लेई इक राष्ट्र इक चुनांस दे प्रस्ताऽ पर विचार लेई खडेरी गेदी उच्चे अख्तियारें आहली समिति दिएं सफारशें गी स्वीकार कीता हा। साबका राष्ट्रपति रामनाथ कोविंद हुंदी अध्यक्षता च खडेरी गेदी इस उच्च स्तरी समिति नै सियासी पार्टिएं ते माहिरें-विशेषज्ञें सने सब्बनें हित धारकें कन्नै व्यापक विचार बटांदरा कीता। इक राष्ट्र इक चुनांस दा सिद्धांत द'ऊं चरणें च लागू कीता जाहग। पैहले चरण च लोकसभा ते विधानसभा दे चुनांस कन्नो-कन्नी करोआए जाडन जदके पंचैतें ते नगर पालिकाएं ज्नेय मुकामी निकायें दे चुनांस, आम चुनाएं दे 100 दिनें दे अंदर करोआए जाडन।

<><><><><><>

NIA

राष्ट्री जांच अजेंसी एनआईए नै शिव खौड़ी रनसू थमां कटड़ा जा'रदी तीर्थ यात्रिएं दी बस पर कीते गेदे आतंकी हमले दे सरबंधे च अज्ज इक आरोपी खलाफ आरोप पत्र दाखल कीता। एनआईए दे प्रवक्ता नै दस्सेआ जे एनआईए दी विशेष अदालत च दाखल कीते गेदे आरोप पत्र च अजेंसी नै हिरासत च लैते गेदे आरोपी किम खान उर्फ हकीम दीप पर बक्ख-बक्ख दफाएं तैह्त आरोप लाए न। एह हमला 9 जून 2024 गी कीता गेआ हा, जिसलै किश बेपंछानू आतंकिएं झंडी मोड़ कश कांढा पुज्जने पर यात्रुएं दी बस पर अन्नेबाह गोलीबारी कीती ही। हमले च 8 तीर्थ यात्रिएं सनें बस डरैवर दी बी मौत होई गई ही ते 41 जनें गंभीर तौरा पर जख्मी होए हे।

<><><><><><>

Principal GMC(byte)

राष्ट्रीय बिरॉलोजी संस्थान पुणे, पीजीआई चंडीगढ़ ते बमारिणं दी रोकथाम सरबंधी राष्ट्रीय केन्द्र थमां विषेश टीमां कल जम्मू पुज्जियां। जेड़ियां राजौरी जिले च 5 न्याणें ते 1 आदमी दी संदिग्ध हालात च मौत आले मामले दी जारी जांच पड़ताल च सैहयोग देंगन। साढ़े जम्मू दे जिला संवाददाता अंकुश शर्मा नै मैडिकल कालेज जम्मू दे प्रिंसिपल ते डीन डॉ. आशुतोष गुप्ता हुंदे हवाले कन्नै जानकारी दित्ती ऐ जे ते मैहकमा सेहत हालात पर नेड़मी तक्क रखे करदा ऐ ते हालात पूरी चाल्ली काबू च न.....बाईट

<><><><><><>

Announcement

आकाशवाणी जम्मू दे प्रादेशिक समाचार एकांश आसेआ कल दपैहरी 12 बज्जियै 10एं मिनटें पर सुगम्य भारत अभियान बारै 15एं मिनटें दे इक विशेष कार्यक्रम दा प्रसारण कीता जा'रदा ऐ। सुगम्य भारत अभियान, भारत सरकार दी इक विशेष पैहलकदमी ऐ जेहदा मकसद दिव्यांग लोकें लेई समाज च इक निर्विघ्न ते साजगार म्हौल कायम करना ऐ। आकाशवाणी जम्मू दे प्रादेशिक समाचार एकांश आसेआ कल इस बारै प्रसारित कीते जा'रदे विशेष कार्यक्रम दा मकसद सरकार दिएं दिव्यांगें सरबंधी बक्ख-बक्ख कल्याणकारी योजनाएं बारै जागरूकता पैदा करना ऐ। कल इस कार्यक्रम दे बाद तुस पक्क गै एहदे पर अपनी प्रतिक्रिया स्हाड़े कन्नै सांझी करेओ। एहदे लेई स्हाड़ी ईमेल आईडी ऐ rnujammu@gmail.com सुनदे र'वो आकाशवाणी समाचार जम्मू मीडियम वेव 990 किलोहार्ट्स, 104 इशारिया 5 मैगाहर्ट्स ते एफएम 100 इशारिया 3 मैगाहर्ट्स पर।

<><><><><><>

Helicopter Service Poonch

गृह मंत्रालय नै जम्मू ते मेंढर बश्कार रिवायती दरें पर इक नमीं हैलीकाप्टर सेवा दी मंजूरी दित्ती ऐ। दूर दरेड़े मेंढर सेक्टर लेई किफायती हवाई सेवा ते बेहतर संपर्क लेई पुट्टी गेदी एह इक ऐतिहासक गैह ऐ। एहदे कन्नै स्याले दरान मैडिकल एमरजेंसी दी सूरतै च बी बड़ी बड़्डी मदाद हासल होग। मेद ऐ जे भविक्ख च इस गैह कन्नै सरहदी सैलसफा गी बी बढ़ावा मिलोग। जम्मू कश्मीर दे शैहरी हवाबाजी सरबंधी मैहकमे दे सचिव मोहम्मद ऐजाज अस्सद होरें दूर दरेड़े इलाकें मेंढर गी स्याले दी राजधानी जम्मू कन्नै कसददे तौर पर जोड़ने लेई हैलीकाप्टर सेवा दा प्रस्ताह भेजेआ हा जेहदे पर केन्द्र सरकारै एह फैसला लैता ऐ।

<><><><><><>

Weather

जम्मू संभाग च हर लंग्घदे दिनै दे कन्नै सीत बधदा जा करदा ऐ। मौसम विभाग नै औंदी 21 दिसम्बर तगर मौसम खुशक रौहने दी पेशगोई कीती दी ऐ। उच्चे फ्हाड़ी इलाकें ते महत्वपूर्ण सिड़कें पर बर्फबारी दे मददेनजर लोकें गी एह सलाह बी जारी कीती गई ऐ जे ओह ट्रैफिक मतल्लक सलाह दी पूरी चाल्ली पालमा करन।

<><><><><><>

Rana JPDCL

जल शक्ति मैहकमे दे मंत्री जावेद अहमद राणा होरें जम्मू संभाग च बर्फबारी करी प्रभावत होने आहले इलाकें, खासतौर पर चिनाब घाटी ते पीर पंजाल च बिजली दी बंडड सरबन्धी तैयारिएं दा कल जायजा लैता। इस मौके उनें सरबन्धत अधिकारिएं गी हिदायतां दित्तिआं जे ओह इक पुख्ता योजना तैयार करी रखन तांजे बर्फबारी दी सूरतै च लोकें गी मते चिरै तोहड़ी बिजली दे बगैर नेई रौहना पवै। राणा होरें अधिकारिएं गी आखेआ जे ओह स्यालें दरान बिजली दी कटौती आहला इक स्पष्ट कार्यक्रम तैयार रखन ते इस बारै लोकें गी अगेत्रे गै जानकारी उपलब्ध करोआई दित्ती जानी लोड़चदी ऐ।

<><><><><><>

Autumn Fest Kishtwar

किश्तवाड़ दे डिप्टी कमीशनर राजेश कुमार शवन होरें जिले दे चौगान मैदान च औंदी 19 दिसम्बर गी आयोजित होने आले ऑटम फ़ैस्ट ते जीडीसी किश्तवाड़ दे आडिटोरियम च आयोजित होने आले हिव सम्मेलन दिएं तैआरिएं गी कल मुकदा रूप दित्ता। इनें अनोखे कार्यक्रमदा मकसद संस्कृति गी बढ़ावा देना ते लोकें गी केन्द्र ते प्रदेश सरकार दिएं बक्ख-बक्ख योजनाएं बारे जानकार बनाना ऐ। एहदे अलावा इस दरान विद्यार्थिएं गी प्रदेश दे बक्ख-बक्ख कालेजें ते यूनिवर्सिटिएं च खाली सीटें लेई आवेदन बारे बी जागरूक बनाया जाग।

<><><><><><>

Ramban Women (byte)

ग्रामीण विकास ते पंचैती राज विभाग नै कला केन्द्र जम्मू च त्रऊं दिनें दी इक प्रदर्शनी शुरु कीती ऐ जेहड़ी आप सहायता समूहें दिएं महिलाएं गी अपनी कारीगरी ते हुनर दा प्रदर्शन करने दा बेह्तरीन मौका उपलब्ध करोआ करदी ऐ। इस प्रदर्शनी च रामबन दी इक महिला उद्यमी नै बी अपना तजुर्बा सांझा कीता ऐ। स्हाड़े जिला संवाददाता अजयदीप सिंह हुंदे कन्नै गल्ल करदे होई रामबन दी महिला उद्यमी शबनम सलीम होरें आखेआ

<><><><><><>

Hockey

हॉकी च अज्ज ओमान दे मस्कट च महिला जूनियर एशिया कप महिला हॉकी फाइनल च भारत दा मकाबला चीन कन्नै होग। एह्दे शा पैहले इस प्रतियोगिता दे इक पूल मैच च चीन नै चीन ने भारत गी 2—1 कन्नै हराया हा। पूल—ए च 9 अंके कन्नै चीन पैहली थाहर पर हा ते भारत दुए नंबरे पर। कल होए दे सैमीफाइनल च भारत नै जापान गी 3—1 कन्नै ते चीन नै दक्खन कोरिया गी 4—1 कप्पै शिकस्त दित्ती।

<><><><><><>